

# Tingkat program cegah penyakit

B.H. 13 AUG 1993

KUALA LUMPUR, Khamis — **Datuk Seri Dr Mahathir Mohamad** meminta hospital awam dan swasta melaksanakan program pencegahan penyakit secara meluas untuk meningkatkan kesihatan masyarakat.

**Perdana Menteri** berkata, sebahagian keuntungan yang diperolehi oleh hospital swasta, kumpulan pengamal kesihatan dan klinik hendaklah diperuntukkan bagi tujuan berkenaan.

**Berucap** merasmikan Minggu Jantung Ke-3, anjuran Yayasan Jantung

Malaysia (YJM), di sini, hari ini, beliau berkata, dermawan dan badan korporat boleh menyumbang bantuan kewangan bagi program kesihatan dan kajian penyelidikan kesihatan yang memanfaatkan orang ramai.

“**Sesungguhnya**, adalah wajar kita meningkatkan usaha menjadikan rakyat Malaysia yang sihat dari segi jasmani, mental dan jantungnya. **Tanggungjawab** ini terletak kepada kita semua,” katanya.

**Hadir sama di majlis** itu ialah Menteri Kesihatan, **Datuk Lee Kim Sai**; **Presi-**

**den YJM**, **Tun Omar Ong Yoke Lin** dan **Pengerusi Minggu Jantung 93**, **Dr J S Sambhi**.

**Dr Mahathir** berkata, penyakit kardiovaskular termasuk jantung koronari dan stroke kini menjadi pembunuh utama di kalangan rakyat.

Perangkaan di antara 1981 hingga 1989 pula mencatatkan kadar kematian meningkat dari 15.3 bagi setiap 100,000 orang kepada 37 bagi setiap 100,000 orang iaitu **per-tambahan** sebanyak 142 peratus.

**Perdana Menteri** turut

menghuraikan faedah yang boleh diperolehi oleh pekerja, majikan dan negara daripada program penjagaan kesihatan.

Katanya, sebuah **tempat kerja** yang sihat hendaklah memberikan faedah kepada semua dan bukannya untuk sekumpulan kakitangan yang sentiasa menjaga kesihatan mereka sahaja.

Menurutnya, ia perlu membabitkan bersama jabatan yang secara tradisi menjalankan fungsi berasingan seperti keselamatan dan kesihatan tempat kerja, pembangunan sum-

ber manusia, komunikasi, faedah pekerja dan perhubungan awam.

Konsep itu membolehkan tenaga kerja diuruskan dengan membentuk budaya korporat berdasarkan hakikat bahawa penjagaan kesihatan seseorang pekerja memberikan faedah dalam menyaingi pasaran dunia yang rumit dan sentiasa berubah.

**Dr Mahathir** berkata, perbelanjaan kerajaan dan tanggungan rakyat boleh dikurangkan de-

**LIHAT MUKA 2**

# Kos biaya kesihatan rakyat dikaji

DARI MUKA 1 B.H. 13 AGUST 1993

ngan tindakan pencegahan seperti dalam menghadapi masalah penyakit kardiovaskular.

"Bagi mengurangkan insiden penyakit kardiovaskular, yang penting ialah cara hidup yang sihat," katanya.

Perdana Menteri berkata, cara hidup sihat bukan sahaja mengurangkan kos perubatan tetapi juga mengurangkan kos sara hidup, umpamanya dengan tidak merokok dan mengelakkan makanan yang mempunyai banyak kolesterol, garam atau gula.

Menurutnya, kerajaan kini terpaksa mengkaji kos untuk membiayai kesihatan rakyat yang selama ini ditanggung oleh kerajaan.

"Sistem pembiayaan percuma rawatan pesakit di Malaysia dimulakan pada zaman penjajah sebagai satu cara mempopularkan rawatan secara Barat," katanya.

Pada waktu itu, rawatan terhadap pemberian ubat yang amat murah harganya.

Dr Mahathir berkata, oleh kerana ketika itu pembedahan jarang kali diperlukan dan tidak melibatkan kos yang tinggi,

khidmat perubatan kerajaan secara percuma tidak menjadi beban dan tidak menyebabkan wang kerajaan dialih daripada perbelanjaan pembangunan lain untuk rakyat.

"Hari ini, keadaan amat berbeza. Rawatan pesakit memerlukan belanja yang tinggi dan kerajaan tidak lagi mampu membiayainya dengan percuma tanpa menjejaskan perbelanjaan untuk infrastruktur yang lain," katanya.

Menurutnya, kerajaan terpaksa mengenakan bayaran yang 'nominal' manakala untuk kes yang memerlukan perbelanjaan tinggi, bayaran yang berpatutan dikenakan.

Disebabkan tidak lagi dapat memberikan rawatan percuma, kata Dr Mahathir, kerajaan sedang mencuba sistem separuh swasta bagi rawatan sakit jantung.

"Dengan cara ini, kaki tangan kerajaan yang berhak masih boleh mendapat rawatan pakar dan orang awam pula mendapat rawatan yang tidak begitu tinggi bayarannya kerana kerajaan membantu dengan menyediakan kemudahan fizikal," katanya.